



KOMUNIKADO

Update Outoridat Maritimo di Korsou tokante shushamentu ku zeta (2)

Willemstad – E banda Suit Ost di Klein Kòrsou ta levamente shushá ku zeta. Esaki ta loke Outoridat Maritimo di Kòrsou ta informá, siguiendo e informashon di ayera, djasabra 27 di mei. Carmabi ta hasi investigashon di e zeta, pero probablemente ta trata di e mesun zeta ku ya kaba a shusha kostanan di Boneiru i Venezuela.

Ta trata aki di un krudo pisá ku tin algun siman kaba ta drif den laman, loke a okashoná ku el a fragmentá i ku e ta drif den pida pida bou di awa. No por miré riba superfisie di laman i tampoko ta posibel pa destrui e zeta riba laman. No ta konosí ainda kiko ta e komposishon di e zeta ku a haña na Klein Kòrsou, pero por lo general por bisa ku hende tin ku evita pa drenta den kontakto ku e tipo di restu di zeta asina.

MAC ta sali for di e prinsipio ku e restunan di zeta tambe lo afektá e kostanan di Kòrsou. P’esei ta pidi instanshanan konserní, i públiko en general, pa keda koutuloso. No ta trata aki di kantidatnan enorme di zeta, pero no ta konosi tampoko aktualmente unda e zeta ta i kon grandi e problema ta.

Ta pidi entre otro hotelnan, skolnan di sambuyamentu i doñonan di empresanan kant’i laman, pa avisá hende ku ta hasi uso di laman tokante e posibilidat di zeta den awa i pa duna instrukshon pa no mishi ku e zeta i tuma kontakto mesora ku outoridatnan na Fort Nassau, RCC Wardakosta of Carmabi, ora ta señala zeta.

MAC ta sigui e situashon di aserka huntu ku outoridatnan lokal i esnan na Boneiru i Aruba. Pa medio di e diferente medionan di komunikashon di Ministerio di Trafiko, Transporte i Komunikashon, ta sigui informá ora ta nesesario.

Te ainda no tin niun motibu pa drenta pániko i ta pidi medionan di komunikashon lokal pa enfatisá esaki ora ta informá públiko. Tambe ta importante pa splika turistanan pa keda trankil i ku no ta trata di un insidente lokal. Outoridatnan den region ta monitor e situashon i ta keda den kontakto estrikto ku otro.